

Na osnovu člana 47. Zakona o rudarstvu Federacije Bosne i Hercegovine („Službene novine Federacije BiH“, broj 26/10) federalni ministar energije, rudarstva i industrije donosi

PRAVILNIK
o obavljanju tehničkog pregleda rudarskih objekata, postrojenja, uređaja i
instalacija, sadržaju zapisnika, načinu imenovanja članova komisije i
naknadama

I. OPŠTE ODREDBE

Član 1.

(Predmet Pravilnika)

U svrhu izdavanja dozvole za upotrebu ovim Pravilnikom se propisuje postupak obavljanja tehničkog pregleda rudarskih objekata, postrojenja, uređaja i instalacija (u daljem tekstu: tehnički pregled) izgrađenih na osnovu odobrenog glavnog i dopunskog rudarskog projekta.

Ovim Pravilnikom se propisuje podnošenje zahtjeva, imenovanje i rad komisije za vršenje tehničkog pregleda (u daljem tekstu: Komisija), sadržaj zapisnika o izvršenom tehničkom pregledu, troškovi tehničkog pregleda, naknade i način izvršenja naknade za rad komisije, izdavanje i sadržaj rješenja - dozvole za upotrebu.

Član 2.

Rudarski objekti, postrojenja, uređaji i instalacije izgrađeni na osnovu odobrenog glavnog i dopunskog rudarskog projekta smiju biti u probnom radu najduže do šest mjeseci od početka rada, koji je evidentiran u knjigama koje je rudnik dužan voditi u skladu sa važećim propisima.

Nakon izvršenog tehničkog pregleda i pozitivnog nalaza interne stručne komisije ovlašteno lice rudarskog privrednog društva izdaje dozvolu za probni rad, o čemu je dužno u roku od osam dana pisanim putem obavijestiti Federalno ministarstvo energije, rudarstva i industrije ili nadležno kantonalno ministarstvo.

II. PODNOŠENJE ZAHTJEVA

Član 3.

(Obavezna dokumentacija)

Tehnički pregled se pokreće zahtjevom privrednog društva.

Zahtjev za tehnički pregled za dobijanje dozvole za upotrebu rudarskih objekata, postrojenja, uređaja i instalacija privredna društva koja eksploatišu mineralne sirovine iz člana 7. stav 1. tač. 1., 2. i 3. Zakona o rudarstvu Federacije Bosne i Hercegovine (u daljem tekstu: Zakon), podnose Federalnom ministarstvu energije, rudarstva i industrije (u daljnjem tekstu: Ministarstvo).

Zahtjev za tehnički pregled privredna društva koja eksploatišu mineralne sirovine iz člana 7. stav 1. tač. 4., 5. i 6. Zakona, podnose kantonalnom ministarstvu nadležnom za rudarstvo.

Uz zahtjev za tehnički pregled privredno društvo je obavezno priložiti:

- dokaz o ispunjavanju uslova za obavljanje registrovane djelatnosti;
- spisak objekata, postrojenja, uređaja, instalacija i opreme koji su predmet tehničkog pregleda;

- spisak odobrenih projekata na osnovu kojih su izgrađeni objekti, postrojenja, uređaji i instalacije uz navođenje broja rješenja pod kojim su odobreni;
- spisak kadrova koji vrše rudarski nadzor i tehničko rukovođenje u skladu sa važećim propisima i odobrenom projektnom dokumentacijom, a odnosi se na predmet tehničkog pregleda;
- spisak isprava o izvršenim periodičnim pregledima oruđa za rad i uređaja, odnosno radnih i pomoćnih prostorija, koji podliježu obaveznim periodičnim pregledima, a koji su predmet tehničkog pregleda;
- vodnu dozvolu i
- okolinsku dozvolu.

III. KOMISIJA, TEHNIČKI PREGLED, ZAPISNIK, DOZVOLA ZA UPOTREBU

Član 4.

(Imenovanje Komisije)

Tehnički pregled se provodi u skladu sa ovim Pravilnikom, Zakonom o upravnom postupku, odredbama Zakona i drugim važećim propisima, a vrši ga komisija za tehnički pregled.

Po podnesenom urednom zahtjevu u skladu sa važećim propisima Ministarstva određuje se voditelj upravnog postupka.

U skladu sa važećim propisima voditelj postupka priprema rješenje koje sadrži :

- sastav i članove komisije;
- iznos i rok u kome je podnosilac zahtjeva dužan izvršiti uplatu na ime naknade troškova tehničkog pregleda u korist Budžeta Federacije Bosne i Hercegovine i obavezu podnosioca zahtjeva nadoknade troškova puta, smještaja i dnevnica članova komisije nastalih izlaskom na teren. Na osnovu važećeg propisa Ministarstva iznos troškova tehničkog pregleda utvrđuje se na bazi norma sati potrebnih za izvršenje tehničkog pregleda i sprovođenje upravnog postupka;
- rok u kome je Komisija dužna izvršiti zadatak;
- obavezu podnosioca zahtjeva da delegira ovlašteno/ovlaštena lica za učešće u tehničkom pregledu.

Rješenje donosi ministar.

Član 5.

Komisija se sastoji od predsjednika i potrebnog broja članova koji se određuje prema vrsti, složenosti i obimu predmeta tehničkog pregleda.

Predsjednik i članovi Komisije mogu biti samo lica koja ispunjavaju uslove propisane članom 73. Zakona.

Radu Komisije obavezno prisustvuje i predstavnik rudarske inspekcije.

Tehničkim pregledima objekata i postrojenja, uređaja i instalacija, koji su izrađeni na osnovu Glavnog rudarskog projekta u radu Komisije učestvuju i predstavnici organa koji je izdao urbanističku saglasnost i okolinsku dozvolu.

Član 6.

(Rad Komisije)

Nakon izvršenja radnji iz člana 4. predsjednik Komisije zakazuje dan i mjesto tehničkog pregleda.

Nakon izvršenog uvida u tehničku dokumentaciju Komisija vrši pregled objekata, postrojenja, uređaja i instalacija, koji su predmet tehničkog pregleda.

Tehničkim pregledom utvrđuje se da li je rudarski objekat, postrojenje, uređaj i instalacija izgrađen, montiran i instaliran u skladu sa odobrenom projektnom dokumentacijom, važećim propisima, mjerama i normativima zaštite na radu i obaveznim standardima, da li je tehnički ispravan i da li ugrožava život i zdravlje zaposlenika i građana.

Član 7.

Nakon izvršenog uviđaja u predmete tehničkog pregleda Komisija sačinjava zapisnik.

U zapisnik se unose svi relevantni podaci, zapažanja, eventualne primjedbe i nedostaci i to :

- da li je predmet tehničkog pregleda izgrađen, montiran i instaliran u skladu sa odobrenom projektnom dokumentacijom;
- da li je izvedeno stanje predmeta tehničkog pregleda u skladu sa važećim propisima, mjerama i normativima zaštite na radu i obaveznim standardima;
- da li je predmet tehničkog pregleda tehnički ispravan i u funkciji i
- da li predmet tehničkog pregleda ugrožava okoliš, život i zdravlje zaposlenika.

Zapisnik potpisuju svi članovi Komisije i učesnici u pregledu ispred privrednog društva.

Član 8.

Za otklanjanja eventualnih nedostataka u zapisniku se daje rok u kojem je podnosilac zahtjeva dužan iste nedostatke otkloniti.

Nakon otklonjenih nedostataka u zadatom roku podnosilac zahtjeva je dužan pismeno izvjestiti voditelja postupka.

U cilju provjere i utvrđivanja stepena otklonjenosti nedostataka voditelj postupka ima pravo sprovesti kontrolni pregled.

Pod uslovom da su nedostaci otklonjeni voditelj postupka će u roku od osam dana pripremiti rješenje- dozvolu za upotrebu i dostaviti ministru na potpis.

Član 9.

(Dozvola za upotrebu)

Upotreba rudarskih objekata, postrojenja, uređaja i instalacija izgrađenih na osnovu odobrenog glavnog i dopunskog rudarskog projekta dozvoljena je na osnovu dozvole za njihovu upotrebu.

Dozvolu za upotrebu rudarskih objekata, postrojenja, uređaja i instalacija izdaje Ministarstvo, odnosno kantonalno ministarstvo nadležno za rudarstvo na prijedlog voditelja postupka.

Rješenjem kojim se dodjeljuje dozvola za upotrebu rudarskog objekata, postrojenja, uređaja i instalacija sadrži:

1. Naziv privrednog društva kojemu se izdaje dozvola;
2. Spisak sa nazivom izgrađenih objekata, postrojenja, uređaja i instalacija sa tehničkim karakteristikama i preciznom lokacijom i
3. Obaveze privrednog društva da sve izmjene u projektnoj dokumentaciji nastale u toku izgradnje objekata mora unijeti u odobrenu projektnu dokumentaciju i čuvati svo vrijeme dok objekat traje.

Pored važećim Zakonom o upravnom postupku propisanih odredbi u obrazloženju je potrebno navesti :

- da su objekat i postrojenje izgrađeni u skladu sa odobrenom projektnom dokumentacijom;
- da je privredno društvo uvažilo uslove date u dozvoli za izvođenje radova i
- da je privredno društvo ispunilo uslove naložene u urbanističkoj saglasnosti i okolinskoj dozvoli.

IV. TROŠKOVI TEHNIČKOG PREGLEDA, NAKNADE ČLANOVIMA KOMISIJE

Član 10.

(Troškovi tehničkog pregleda i naknade za rad komisije)

U skladu sa važećim rješenjem Ministarstva troškove tehničkog pregleda podnosilac zahtjeva je prije pregleda dužan uplatiti na račun javnih prihoda Budžeta Federacije BiH.

Shodno čl. 111. i 114. Zakona o upravnom postupku i važećim rješenjem Ministarstva putne troškove članova komisije podnosilac zahtjeva je dužan uplatiti članovima komisije nakon izvršenog tehničkog pregleda.

Komisiji će se nakon izvršenog tehničkog pregleda iz sredstava iz stava 1. ovog člana, a u skladu sa važećim rješenjem Ministarstva isplatiti naknada.

V. ZAVRŠNE ODREDBE

Član 11.

Ovaj Pravilnik stupa na snagu osmog dana od dana objave u „Službenim novinama Federacije B i H“.

Broj: 06-02-490/14
09. juna 2014. godine
Mostar

Ministar
Erdal Trhulj s.r.